

समा. 09.20 Hrs

Headlines

1. मुख्यमंत्री उमर अब्दुल्ला हरे जम्मू-कश्मीर च डिजिटल सुधारें ते उपलब्धियें गी दर्शादी काँफी-टेबल बुक “समन्वय” दा विमोचन कीता ते आखेया जे डिजिटलीकरण दी मदद कन्ने शासन ते सेवाएं दी पुज्ज दूर-दरेडे इलाकें तगर बी पुज्जै करदी ऐ।
2. उपमुख्यमंत्री हारे जम्मू च लोकें दे केई प्रतिनिधिमंडलें कन्ने गल्लबात कीती- लोकें दियें समस्याएं गी तौले ते पैहल दी बिनाह पर हल्ल करने पर जोर दिता।
3. राई-बाई मंत्री हारे कल जम्मू च आई.सी.ए.आर दे उत्तरी ज़ोन दे कृषि विज्ञान केंद्रें दी सलाना जोनल कार्जशाला दा उदघाटन कीता।
4. अरुणाचल प्रदेश पुलसै- पाकिस्तान लेई जसूसी करने दे इक मामले च जम्मू-कश्मीर थमां 2 जनें गी गिरफ्तार कीता ऐ।
5. मौसम विभाग दा आखना ऐ जे अगले 7एं दिनें दौरान जम्मू प्रांतें दे झिगड़े इलाकें च धुंध दा सामना करना पेई सकदा ऐ।

CM Samnvay

मुख्यमंत्री उमर अब्दुल्ला हों BISAG-N दे टेक्नॉलोजी आधारित प्रोजेक्टें ते जम्मू-कश्मीर च डिजिटल बदलाव गी दर्शादी इक कताब “समन्वय” दा विमोचन कीता। BISAG-N जेहदा पूरा

नां भास्कराचार्य नैशनल इंस्टीच्यूट फॉर स्पेस एप्लीकेशन एंड जियो इन्फॉमेटिक्स ऐ-इलेक्ट्रनिक्स ते सूचना प्रोद्योगिकी मंत्रालय तैहत कम्म करने आहली इक खुदमुख्तायर वैज्ञानिक निकाए ऐ। इस मौके उमर अब्दुल्ला होरें जम्मू-कश्मीर च बी शासन सरबन्धि चुनौतियें दे वैज्ञानिक हल्ल तुप्पी देने लेई BISAG-N दी सराहना कीती। उनें आखेया जे जम्मू-कश्मीर दी भूगौलिक स्थिति ते मौसमी हालात शैहरी ते दूर-दरेडे इलाकें च शासन गी इक्के चाली नै पुजाने दे कम्मै च केई रुकावटां ते चुनौतियां पैदा करदे न- पर डिजिटलीकरण कन्ने इनें चुनौतियें गी असरदार ढंगे सिर दूर करने च मदद थोंदी ऐ। उनें आखेया जे एह कॉफी टैबल बुक “समन्वय” टैकनॉलोजी आधारित पैहलकदमियें गी दर्शादी ऐ- जिन्दे नै जम्मू-कश्मीर च प्रशासनिक कुशलता च बड़ा मता सुधार आया ऐ। मुखमन्त्री होरें आखेया जे इस कताब दे प्रकाश कन्ने भविष्य च बी डिजिटल उपलब्धियें दे दस्तावेजीकरण लेई प्रेरणा हासल होग।

<><><><><><>

Dy DM Delegations

उपमुखमन्त्री सुरिन्दर चौधरी होरें जंदे रोज जम्मू च सिविल सचिवालय च बक्ख-बक्ख सार्वजनिक प्रतिनिधिमंडलें कन्ने मलाटी कीती ते लोकें दियें शकैतें गी तौले दूर करने ते समूलचे जम्मू-कश्मीर च सेवाएं गी सुचारु ढंगे कन्ने उपलब्ध करोआने दे महत्वै पर जोर पाया। बक्ख-बक्ख जिलें दे प्रतिनिधिमंडलें कन्ने गल्लबात करदे होई उनें उनेंगी यकीन दोआया जे उन्दे मसलें गी तौले हल करने लेई साजगार मंच पर पुट्टेया जाग। उपमुखमन्त्री होरें अफसरें गी निर्देश दिते जे ओह लोकें दियें चिंताएं गी तरजीह देन। प्रतिनिधिमंडलें च विद्यार्थी- नौकरी

तुप्पने आहलें लोक- इच्छुक उद्यमी- कारोबारी संगठन ते सिविल समाज दे संगठन दे नुमायंदे ते केन्द्र शासित प्रदेश दी बक्ख-बक्ख थारें थमां आए दे केई लोक शामिल हे।

<><><><><><>

Dar KVKs

राई-बाई मैहकमे दे मंत्री जावेद अमहद डार होरें कल शेर-ए-कश्मीर एग्रीकल्चर युनिवर्सिटी दे चट्ठा कैम्पस च- ICAR-ATRI ज़ोन- इक्क दे सब्बन कृषि विज्ञान केन्द्रों दी सलाना ज़ोनल कार्यशाला दा उदघाटन कीता। त्रंऊ दिनें तोड़ी चलने आहली इस कार्यशाला च उत्तर-भारत दे बक्ख-बक्ख हिस्सें थमां हितधारक शामिल होआ करदे न- जिनेंगी इत्थे अपनी कारकरदगी दा मूलांकन करने ते भविष्य लेई अपनियें नीतियें ते कम्म करने दे तौर-तरीकें गी आकार देने च मदद थोग। इस मौके मंत्री होरें कृषि विज्ञान केन्द्रों दी भूमिका दी सराहना कीती- जेहड़े जमीनी सतह पर कृषि सुधारें- नमियें काहड़ें ते होरनें पैहलकदमियें करसानें तगर पुजाने दा कम्म करदे न। इस मौके मीडिया कन्ने गल्ल करदे होई मंत्री होरें आखेया.

<><><><><><>

Farmers SKUAST J

उधमपुर जिले दे 2 ब्लॉकें थमां 70 करसानें गी शेर-ए-कश्मीर युनिवर्सिटी ऑफ एग्रीकल्चरल साइंस ते टेक्नोलॉजी जम्मू च सिखलाई शिविर लेई भेजेया गया ऐ। इसदा मकसद करसानें गी अज्जै-कल्लै दियें तकनीकें बारे जानकारी बनाना ऐ। उधमपुर पूर्व थमां विधायक आर.एस. पठानिया होरें इनें करसानें गी झंडी दस्सियै खाना कीता। उनें करसानें दी भलाई-बेहतरी ते

उं'दी खुशहाली प्रति सरकार दी वचनबद्धता गी फही पक्का कीता। आकाशवाणी समाचार कन्नै गल्ल करदे होई विधायक आर.एस. पठानियां होरें आखेया.

<><><><><><>

Prog. Announcement

आकाशवाणी दा क्षेत्रीय समाचार एकांश जम्मू अज्ज राश्ट्री करसान दिवस-2025 दे मौके पर 25एं मिनटें दा इक विशेष कार्यक्रम पेश करोग। इस विशेष प्रसारण दा विशेषार होग 'राश्ट्र गी खुराक देने आहले हत्थें गी सलाम'। इस कार्यक्रम दा प्रसारण दपैहरी 12 बजे कीता जाहग। इस विशेष प्रसारण च स्हाढ़े परौहने होडन कृषि उत्पादन ते करसान कल्याण मैहकमे दे संयुक्त निदेशक श्री संजय आनंद, जेहड़े कार्यक्रम दे विशे पर अपने माहिराना विचार स्हाढ़े कन्नै सांझे करडन। कार्यक्रम दी मेजबानी स्हाढ़े एंकर विजय बजाज होर करा करदे न। इस चाल्ली दे होर सूचना प्रदान करने आहले प्रसारणें गी तुस आकाशवाणी जम्मू दे मीडियम वेव 303 मीटर यानि 990 किलोहर्टज् ते एफ.एम 103 मेगाहर्टज पर सुनी सकदे ओ।

<><><><><><>

AP Espionage

अरुणाचल प्रदेश पुलसै जम्मू-कश्मीर दे कुपवाड़ा थमां 2 ते इटानगर थमां 3 लोकें गी पाकिस्तान लेई जसूसी आहले इक मामले दी जांच दे सिलसिले च गिरफ्तार कीता ऐ। अरुणाचल प्रदेश दे कन्नू बवस्था सरबंधि IGP चुखू अप्पा होरें जानकारी दिती ऐ जे पैहली गिरफ्तारी 21 नवम्बर गी होई ही- जिसलै नज़ीर अहमद मलिक नां दे आदमी गी कुपवाड़ा

थमां हिरासतै च लैता गया हा- ओहदे बाद कीती गेदी पुच्छ-गिच्छ मगरा हासल जानकारी दी बिनाह पर 4 होर लोकें गी गिरफ्तार कीता गया ऐ। उनें लोकें पर संवेदनशील जानकारी किट्ठी करियै दुश्मन मुख्य कन्ने सांझी करने दा आरोप ऐ। इस मामले च अग्गे दी पुच्छ पड़ताल-तश्तीफ ते जांच दा कम्म चलै रदा ऐ- जेहदे च फॉरेंसिक जांच-परख बी शामिल ऐ। IGP चुखू अप्पा होरें इस बारे जानकारी सांझी करदे होई आखेया।

<><><><><><>

MoS Dogri

केन्द्रीय मंत्री डाक्टर जितेन्द्र सिंह होरें जंदे रोज जम्मू च लोआए गेदे “डोगरी मानता दिवस” कार्यक्रम गी सम्बोधित कीता। इस मौके पर बोलदे होई केन्द्रीय मंत्री होरें आखेया जे डोगरी भाषा ते संस्कृति- डोगरी बोलने आहले समुदाय दी पंछान ते विरासत दे केन्द्र च ऐ ते समाज दे हर तबके दे लोकें इसी संजोना लोड़चदा। डाक्टर सिंह होरें नौजवानें गी पसंद औने आहली सामग्री तयार करियै- डोगरी भाषा गी बढ़ावा देने ते समृद्ध करने आस्तै डिजिटल प्लेटफार्मे ते आधुनिक उपकरणों दे राएं Gen Zee कन्ने जुड़ने दी जरूरतै पर जोर पाया। उनें आखेया।

<><><><><><>

Weather-Update

मौसम विभाग नै जम्मू-कश्मीर लेई तापमान सरबन्धी ताजा जानकारी जारी कीती ऐ। विभाग मुजब अगले 7 दिनें दरान जम्मू खितते दे मैदानी इलाकें च बड़ी मती धुंध पेई सकदी ऐ। 23 थमां 29 दिसंबर तगर मौसम आमतौर पर बदलोखड़ा रौहग। 30 दिसंबर थमां पैहली जनवरी बश्कार मैदानी इलाकें च हल्की बरखा पौने ते उच्चियें धारें पर हल्की बर्फबारी होने दे असार

न। 2 जनवरी थमां 3 जनवरी बश्कार मौसम आमतौर पर बदलोखड़ा रौहग। मौसम बारै होर जानकारी दिंदे होई इक अधिकारी नै आखेआ.

<><><><><><>